

dam. In ea sunt hæ civitates *Maresa, Rhinocorura, Raphia, Anthedon, Ascalon, Asotus, & Gaza*. Judæa Palestina pars longe celeberrima, sita inter Mare Mediterraneum & lacum Asphaltitem, atque inter Samariam & Idumæam. Nomen ei potissima Tribus *Juda* indidit, in qua urbes & opida plurima fuerunt: sed omnium clarissima *Hierusalem*. Iudææ Metropolis toto Orbe celeberrima. Tempore Ptolemæi *Elia Capitolia* dicebatur, hodieque a Barbaris Incolis *Cox* seu *Godz*, aut *Chutz* dicitur. Præter Hierosolymam in Iudæa sunt etiam alia Opida, ac loca celebria, ut *Iericho*, *Joppe* quæ nunc *Jaffa*: turris *Stratonis* postea nuncupata *Cæsarea*, *Bethlehem*, *Chebron*, sive *Hebron*, prius *Arbee*, & *mambre* & *Cariatharbe*, hoc est, civitas quatuor virorum. Et trans Jordanem *macherus* Opidum & Castrum munitissimum. Hic etiam fuere *Sodoma* & *Gomorra*, quæ ob flagitia & scelera funditus subversa sunt. Sequitur *Samaria* media inter Iudæam & Galilæam sita. Nomen ei a Metropoli cognomine, quam *Amri* Rex Israel condidit, nunc *Sebeste* dicitur: Opida hic sunt *Sichem*, postea *Neapolis*, *Capernaum*, *Bethsaida*, *Chorazin*. *Galilæa* sita est inter Montem Libanum & Samariam. Hæc in Superiorem & Inferiorem dividitur: Superior, aliter *Galilæa gentium* dicta, Tyro contermina. Inferior sita ad mare Tiberiadis vel Genezareth. Urbes in hac sunt *Naim*, *Cana*, *Nazareth* & *Gadara*. Cæterum tota regio inter duo Maria & Iordanem flumen sita, Lacus non paucos habet, eosque qui navigabiles sunt, & optimis abundant piscibus. Fluvius vero *Iordanis* qui Hebræis *Jarden*, hanc regionem quam longa est secatur. Hic ut scribit Hieronymus, ex duobus fontibus haud procul a se distans *Ior* scilicet & *Dan* bicornis erumpit, alterum cornu *Ior*, alterum *Dan* vocant adcolæ, conjuncti efficiunt *Iordan* vel *Iordanem*. Montes præcipuos habet *Hermon*, ad Orientem, & *Tabor* ad Occidentem, eosque maximos & editissimos, quorum alij vel brachia, vel partes, vel ramenta sunt. *Ebal* enim *Bethoron*, & *Mispa*, sive *Maspha*, & *Betel* ad *Hermon*: *Gelboe*, *Gerizim*, *Sarona*, & postremus ac mari proximus *Carmel* ad *Tabor* referuntur. Sunt & isti, *Mons Sion*, *Moriah*, *Olivarum*, *Calvarie*, & alij. Silvis etiam Lucis & Nemoribus superbit. Multa etiam hic & potissimum Hierosolymis præclara ædificia. Ex ijs vero operibus quæ præcipua antiquis & recentioribus temporibus in urbe fuisse commemorantur, primum fuit *Mons Domus*, & *Iebusaorum* Arx, ad quam jam dirutam arca Domini a Davide Rege asportata fuit, in eoq; loco mansit, quoad Templum a Salomone constructum consecratumque fuit: cujus loci vestigia nunc exstant, ubi & Christus Pascha cœnasse perhibetur. Ibidem Davidis Regumq; Iudææ monumenta visuntur. Fuit etiam *Domus David*, quæ hætenus turris *David* nomine appellata conservatur. Mello etiam reliquæ sunt certis ruinis ad Montis *Moriah* extrema conspicuæ. Imprimis autem memorandum Templum Salomonis celeberrimum, quod spatio septem annorum centum & quinquaginta millium Hominum continua opera absolvit. De cujus magnificentia in lib. i Regum, cap. v: & vii, & Chron. lib. iii. cap. iii: & iv abunde legere est. De legibus & institutis brevitati studentes nihil adjiciemus, Lectores ad libros Moysis, Exodum, Leviticum, Numeros, & Deuteronomium remittentes.

*Urbium
Nomina.*

*Lacus & Flumē
Jordanis.*

Montes.

*Silva.
Opera publica.*